

DISIZOS

Disizos...

Sonnios chi si pesan
da-i custu foghile
anneuladu 'e chelos de ranzolos
frittu da-i annos e annorios
da-i cando nonnu
cun pasida oghe
allutta 'e fantasia
tramaiat e istramaiat
su filu 'e sos contados
de fadas e de orcos
de caddos birdes alados
de siddados e majias...

Disizos de antigas paraulas
raidadas de palpados de vida
pro unu coro
assidu 'e veridade
che basos de lentore.

Disizos de dulches carignos
de manos chen'ingannia
nodosas de tribagliu
ranzigas de suore.

Disizos...

Pantasimas alleventadas
ch'isvanessin che neula
in sa pedra abandonada
'e custu foghile ismentigadu
da-i annos e annorios
che-i sos bonos sentidos.

DESIDERI

Desideri... / Sogni che si levano / da questo focolare / annebbiato / di ragnatele / freddo / da anni e anni / da quando nonno / con voce pacata / accesa di fantasia / intrecciava e sfilacciava / il filo dei racconti / di fate e di orchi / di cavalli verdi alati / di tesori e magie... / Desideri di antiche parole / gravide / di palpiti di vita / per un cuore / assetato di verità / come baci di rugiada. / Desideri di dolci carezze / di mani / senza inganno / nodose di lavoro / amare di sudore. / Desideri... / Fantasmi impazziti / che svaniscono come nebbia / nella pietra abbandonata / di questo focolare / dimenticato / da anni e anni / come i buoni sentimenti.